

嬌是嬌佇咱心內

藍色 e 海洋
綠色 e 島嶼
一幅風景真好看
無分佇內外
天地無佸(loa)大
攏是蝴蝶鳥隻舞蹈 e 地平線
波湧呼喚 e 迄月
著有懸懸 e 山
山山水水包容相陪伴
代代世世茲是希望 e 海岸

藍色 e 海洋
綠色 e 島嶼
茲是寶島好所在
倚山有山珍
靠海有海味
攏是团团孫孫趁食 e 地平線
徘徊山嶺 e 迄月
著有空闊 e 海
天邊海角有緣相疼愛
久久長長嬌是嬌佇咱心內

藍色 e 海洋
綠色 e 島嶼
一幅山水千萬代
風風雨雨若過去
浮出嬌款 e 七彩
趕緊擘開心胸展目眉
永遠永遠嬌是嬌佇咱將來

風中 e 心聲

風中又閣傳來夢中 e 心聲
空中出現烏鶯 e 形影
烏鶯叫一聲
乎阮心頭定
保護即个岫 (巢)
親像看顧即間茨
天理天註定
阮不免一直驚惶

風中又閣傳來夢中 e 心聲
空中出現烏鶯 e 形影
烏鶯叫二聲
叫阮企乎正
有樹則有岫 (巢)
田園每(beh)媿蔭田莊
家內 e 運命
攏麼著愛家已成(chialN)

風中又閣傳來夢中 e 心聲
空中出現烏鶯 e 形影
烏鶯叫三聲
聲聲叫心疼
土地 親阿娘
無親娘哪躉有罔
看懸閣看遠
暫時歇佇牛尻脊 phiaN(背部)

風中又閣傳來夢中 e 心聲
空中出現烏鶯 e 形影
烏鶯若出聲
土地著靈聖
可惡 e 厲鴉 (老鷹)
亞霸陰險 e 厲鴉
你若傷奢焱
阮著決心共你拚

海翁泐對迄片邊

佇小島 e 海圻(kiN)

海翁泐對迄片邊

闊闊 e 太平洋

到底有啥物

請你按懸懸 e 水柱共看去

海翁按怎泐

波痕按怎圓

佇深沉 e 海面

浮出自由美夢 e 詩篇

到底爲啥物

海翁泐對迄片邊

鹹鹹 e 太平洋

是每(beh)怎樣鼻

請你看懸懸 e 水柱來問伊

海翁按怎飲(lim)

海水按怎甜

佇孤單 e 海上

總有一日我會出頭天

未暗淡 e 油燈

過去 e 暗暝

點一葩油燈

暗淡 e 光線只有三五燭

已經會中(tang)看著阮全家

阿姊參阿母刺蓬紗

阮兄弟綴阿爸恬恬咧看冊

阿公含薰吹頭佇亭仔腳咧臥(the)

未暗淡 e 燈火

清清楚楚照著阮全家

即擺 e 暗暝

攏是霓虹燈

五彩十色閃閃爍爍千萬燭

夜都市咧開花

上甜蜜 e 是每(beh)三更五更

即片,歸茨內光透底

清清楚楚給(ka)看詳細

茨內一個老歲仔佇咧等待

尋(chhoe)無茨 e 少年家